

Արեւը մտաւ, երբ մենք հեծանք ձիերը: Ես չկարողացայ հասկանալ, թէ ի՞նչ էր պատճառը, որ Ասլանը միշտ գիշերով էր ճանապարհ գնում:

### ԽԴ. ԳԻԺ ՏԵՐՏԵՐԸ ԵՒ ԲԺԻՇԿԸ

Երկրորդ աւուր առաւօտեան պահուն մենք հասանք ոչ այնքան հեռու Վանից մի հայաքնակ գիւղ: – Այստեղ, ասաց Ասլանը, պետք է փոքր – ինչ հանգստանալ:

Ինձ շատ հաճելի էր նրա խօսքը, որովհետեւ ամբողջ գիշերը չէինք քնել, անդադար ճանապարհ էինք եկած:

Նա ձին քշեց դեպի մի տուն, որ գիւղի քահանային էր պատկանում, ես էլ հետեւեցի նրան: Քահանան յայտնի էր այս կողմերում իր մականունով՝ «դայի քեշիչ» – որ նշանակում է գիժ տերտեր, բայց ոչ այն տեսակ գիժերից, որոնք խելք չունեն, այլ այն տեսակներից, որոնք մեր գրաբար լեզվում արտասանում են բառերովս «խօլ» կամ «վիրագ»:

Մենք հասանք նրա տանը նոյն ժամանակներում, երբ նա, մի քանի մարդկանց իր դռան առջեւ կապած, ծեծ էր տալիս:

– Զը՛մ, տերտեր, էլ ի՞նչ կայ, – ասաց Ասլանը նրան տեսնելով: – Դարձեալ արդարութեան գաւազանը ձեռք ես առել...

– Այս անպիտաններին պետք է մի փոքր խրատել... – պատասխանեց նա անփոյթ կերպով եւ մօտեցաւ մեզ: – Դէ՛, ցած իջէք, Վանից նոր բերել տոած լաւ արաղ եւ գինի ունեմ:

– Բայց մինչեւ մենք կը խմենք ձեր լաւ արաղն ու գինին, դուք հրամայեցէք, որ այս «անպիտաններին» արծակեն, – ասաց Ասլանը ծիծաղելով:

– Ոչ, դուք իմ դատաստանական գործերը մի՛ խառնէք, անպիտանները պետք է պատժեն, – ասաց նա: – Գնանք տուն:

Յանցաւորներն երկու քրդեր էին, որոնք, ասում էր տերտերը, գողացել են գիւղի նախիրից երեք կովեր: Ասլանը այս ասելով, այլեւս չմիջնորդեց. մտանք տերտերի տունը: Նա մեզ տարաւ մի սենեակ, որ իր հիւրանոցն էր եւ միեւնոյն ժամանակ քնարանը, բայց տերտերը նրան կոչում էր դիւանխասայ, այսինքն, դիւանատուն:

Ես մտածում էի, թէ այնտեղ կը գտնեմ տեր Թողիկի սենեակի նման զանազան կախարդական զրթեր կամ Այսմաւուրք. բայց մի թղթի պատառ անգամ չկար այնտեղ: Այնտեղ կային՝ նիզակներ, հրացաններ եւ զանազան տեսակ զէնքեր: